



Georgius ex honesta familia apud Germanos natus, et omni genere uirtutum educatus est. Is à pueris operam literis dedit, atq; in liberalibus studijs plurimum profecit. Postea uerò cum adoleuisset, Maximiliani Cæsaris castra secutus, talem se contra hostes exhibuit, ut à Cæsare eques cõstitueretur. Cum hoc modo literis & armis corporis atque animi uirtutes declarasset, omnibus doctis etiam apud exteras nationes innotuit, atq; à Paulo Iouio inter præstantissimos Germanos celebratus fuit. Deinde etiam Vratislauiensis præpositus electus, suam functionē magna laude administravit, et Erasmo Roterodamo ob præclaram doctrinam

familiaris extitit. Scripsit is orationem Panegyricam de laudibus Maximiliani, Carolo & Ferdinando Cæsaribus nuncupata, quæ Basileæ 1520 fuit edita. Postea quoq; orationem ad principes Christianos composuit, de religiõe ac communi concordia, quæ Romæ est publicata. Itaq; factum ut Georgius ob varias uirtutes Germaniam patriam decorarit, atq; meritò hoc loco inter Heroes connumeratus fuerit. P. Iouius in elog. doct.